

lis Gnovis

■ PONTEBE. Precisazion sul Implant idroelettric

Dopo di vè let lis informazions popularizadis de stampe regionâl sul cont de Centrâl che la societât «Idroelettrica Fella srl» e bramave di realizâ fra San Roc di Pontebe e Perteade, il «Consorzio Vicinale Laglesie San Leopoldo» al à scugnût intervignî par sclari i esits de udience dal Tribunâl superiôr des aghis dai 10 di Fevrâr. «L'autorizazion uniche e je decjadude e l'interès public parie. Si che Idroelettrica Fella srl no à nissun titul par continuâ a fâ su la sô Centrâl», al à declarât l'avocat Antonio Forza. Seont il Domini colettif (ch'al periculave di vigni escomiât par colpe de realizazion de «Gabine primarie» dal implant idroelettric privât), la Societât di Vençon e à otignût dome di sospindi l'ordin regionâl di tornâ a regolâ il lûc dal cantir cemût ch'al jere prin. A chest rivuart, il «Tsap» ur à racomandât a Regjon e Consuart di visâ «se cualchidun al ves di fâ cualsisei opare, anje su lis proprietâts de societât Idroelettrica Fella, in mût ch'al puedi intervignî par riformâ lis misuris cautelârs stabilidis in zornade di vuê».

■ TUMIEÇ. L'art cuintri de crisi climatiche



Par colpe de pandemie, il concors e la mostre «ClimArte», inmaneâs de zoventût dai «Fridays For Future Carnia», a son diventâts ducj i doi digjitâi. La forme gnove de iniziative culturâl e je proferide tal lûc internet <https://fridaysforfuturefvg.it/carnia/climarte-una-mostra-a-tema-cambiamento-climatico-a-tolmezzo/>, dulà che si cjate regolament e schede di partecipazion. Artiscj di ogni etât e di ogni setôr a son inviadâts a ingaiâsi tal progjet che, tal mès di Mai cu ven, al proponarà un «virtual tour online» e, salacor, anje une mostre fische, se l'emergence e sarà sot control. I zovins ambientalscj cjargnei a bramin di coinvolzi i artiscj te «mission di testimoneâ la crisi climatiche e di comunicâ la bisugne streme di operâ, puartant energjiis positivis par insumiâsi e fâ sù un avignî plui just e plui sostenibil».

■ BUDOIE. Il senatôr di Dardâc



Fra i senatôrs democratics che, cun Joe Biden, a ciraran di voltâ pagjine, daspò de «parentesi» Trump, al operarà fin tal 2023 anje il soestant di divignince furlane Pat Leahy (classe 1940; https://ballotpedia.org/List_of_United_States_Senators_from_Vermont), che l'enciclopedie libare «Wikipedia» e presente come fi di Alba Zamboni di Dardâc, vile dal Cumon di Budoie. Leahy al è un veteran de politiche americane e, vie pal 2021 come anje fra 2012 e 2015, al à stât president «pro tempore» dal Senât (https://it.wikipedia.org/wiki/Patrick_Leahy).

Miercus 24	S. Sergji di Cesaree	Domenie 28	Il Domenie di C.
Joibe 25	S. Cesari martar	Lunis 1	S. Albin vescul
Vinars 26	S. Alessandri vescul	Martars 2	S. Quint taumaturc
Sabide 27	S. Gabriêl de dolorade	Il timp	Anjemò zornadis fredis



Il soreli
Ai 24 al iève aes 6.55 e al va a mont aes 17.46.



La lune
Ai 27 Lune plene.

Il proverbi
In cent agns e cent dis, l'aghe e torne ai siei pais.

Lis voris dal mès
Vierzèt e coltat lis sparginis. In spiete de Vierte, comprait gnovis semencis.

Coresime «Laudato si'»

Imprescj par cjaminâ
«Une strade di conversion integrâl»

«**T**omait di me cun dut il cûr: l'invit a la pinitince che dai prins dis di Coresime al rivoche di un continui, ispirât dal profete Joel, al è diventât ancjemò plui esigent. In grazie de sensibilitât soletade de encicliche «Laudato si'», l'apel pal dizun, pe preiere e pe carità al ven inricjât dal invit a percori la strade rimpinide de «Conversion ecologjiche».

Par prudelâ chest impegn, che dispès la Pastorâl parochiâl no à ancjemò assimilât, a son daûr a multiplicâsi jutoris, positifs e modernis.

Il plui organic al risulde chel dal «Moviment catolic mondiâl pe clime», ch'al dediche une purizion dal so lûc internet par che ducj i 40 dis di preparazion a la Pasche, tal «An Lauda-to si'» (ch'al celebre il cuint aniversari de letare di Pape Francesc), a diventin «Coresime Laudato si'».

La propueste e consist «intun viaç di conversion ecologjiche mediant la riflessione, il pinti-ment e il rinovament. Se s'impegnar in mudaments positifs, a traviars dal dizun e tal cambiament dal stîl di vite – a scrivin chei dal «Moviment catolic mondiâl pe clime» – o rivar in a vivi cu la nestre Tiere e fra di nô in mût plui solidari e o rivar in a incitâ lis nestris sûrs e i nestris fradis a messedâsi in chest procès di conversion».

La «Coresime Laudato si'» e je començade Miercus de Cinise cuntun ritîr spirituâl «on li-ne», guidât dai «Animatori Laudato si'» talians.

A la direzion web <https://laudatosilent.org/it/home-it/>, si podarà seguî la «Via Crucis», cu lis stanziis trasmetudis anje par «Facebook» e «YouTube». Il lûc



Dôs fra lis schedis cotidianis dal itinerari spirituâl «Cuarante dis, navigant cun Laudato si' e Querida Amazonia»



«Monte sù te canoe; cjate l'ecuilibri necessari, di mût di jentrâ tes aghis de Ecologjie integrâl, displatant chês ch'a saran Buinis gnovis»

internet al propon bielzà il librut «Preieris par un Viaç di sperance», cul «Esam di cussience ecologjic», la «Coronute de Coresime», il «Rosari Laudato si'», lis «Stanziis de Via Crucis» e il telâr par inmaneâ une meditazion cuntun groput di personis.

Cun di plui, si pues discjamâ il «Lunari di Coresime» ch'al pant propuestis cotidianis par «Pintîsi», «Operâ», «Rifleti», «Condividi» e «Preâ cul Creât».

Parimentri ben impastanade e je la propueste, par castilian e par portughês, ch'è rive de Rêt eclesiâl panamazoniche «Repam». La guide cotidiane pe Coresime e je intitulade «Cuarante dis, navigant cun Laudato si' e Querida Amazonia» (<https://redamazonia.org/40-dias-navegando-con-laudato-si-en-la-querida-amazonia/>). L'itinerari al bandone il simbul de «strade», sielzût dal «Moviment catolic mondiâl pe cli-me», par cjapâ sù il speli de canoe.

Il percors di «Conversion integrâl» al smire il rinovament de religion e de mission, su la fe-rade de «Laudato si'» e da l'esortazion post sinodâl «Querida Amazonia».

Il jesuit di Manaus, Adelson Araújo dos Santos, professôr di Spiritualitât

li de Universitât Gregoriana di Rome, al propon par ogni zornade une schede (che si pues discjamâ sui calcoladôrs), cuntune preiere d'invocazion, cu la leture de Peraule di Diu, cuntun coment gjavât fûr de prime encicliche social di Pape Francesc e cuntune propueste d'impegn, «Par lâ indevant viers aghis plui fondis».

La propueste spirituâl e jentre intal procès di «Conversion integrâl», screât 3 agns indaûr de Glesie panamazoniche. La prime edizion e jere stade dedicade a la pre-parazion de Sinode pe Amazonie dal 2019 e la seconde, intant de Coresime dal 2020, a la riflessione su l'esortazion apostoliche «Querida Amazonia».

Mario Zili

Messe par furlan

La Messe par furlan e ven cjantade ogni sabide a 5 e mieze sore sere (17.30), li de capele de «Puritât», daprûf dal domo. Sabide ai 27 Fevrâr al cjantarà messe pre C. Bevilacqua. Radio Spazio e trasmet sul moment la liturgjie.

Peraulis in dismentie par cure di Mario Martinis

❖ PIRLÂ

v. = trotolare, girare come una trottola, piroettare (voce settentrionale dalla forma denominale pirlu «trottola», da una radice espressiva *prl-, con raccostamenti paretimologici e derivati pirlum «pera» o da radicale *pir «pirlu», quanto a forma) O viôt che al pirlu content, usgnot al va di sigûr a cjatâ la morose. Vedo che trottola contento, stasera sicuramente va a trovare la fidanzata.

❖ PIRUL

s.m. = ciondolino d'orecchini a forma di pera allungata, di solito di corallo o simili (forse dal latino pirula «piccola pera», data dalla forma degli orecchi) Si è distacât il pirul dal rincjin e cumò no sai dulà cirîlu. Mi si è staccato il ciondolino dell'orecchino ed ora non so dove cercarlo.

❖ PIZIGHET

s.m. = becchino (dal verbo friulano pizzâ «pizzicare, indurre pizzicare; prudere») Il barbe dal gno om al fâs di mistîr il pizighet. Lo zio di mio marito fa di mestiere il becchino.

❖ PISTÔR

s.m. = fornaio, panettiere (dal latino pistor «fornaio», in origine chi pestava il grano nel mortaio, a sua volta da pinsere «pestare») O ai ordenât al pistôr une biele torte pal inovâl. Ho ordinato al fornaio una bella torta per l'anniversario.

❖ PISTRİÇOT

s.m. = pastrocchio (dal verbo pistrizzâ, pastrocjâ «pasticciare, pastrocchiare») Chest al è un pistrîçot e no sta tirâ fûr scusis. Questo è un pastrocchio e non esibire scuse.